

«Pass per pass e na en in culp»

Iniziativa sortida da l'energia nucleara

DA GION NUTEGN STGIER / ANR

■ **Las partidas burgaisas da noss chantun èn cunter l'iniziativa dal pievel per l'abandun da l'energia atomara. La forza idraulica profitescha betg sche quella iniziativa vegn acceptada, han ditg ier ils adversaris da l'iniziativa. Ultra da quai donnegia ella l'economia.** En 17 dis decida il suveran svizzer cunter ubain per l'iniziativa dal pievel per la sortida programmada da l'energia nucleara. L'iniziativa vul scumandar la construcziun da novas ovras nuclearas en Svizra e limitar la durada da las ovras atomaras existentas en funcziun. Ultra da quai duai la confederaziun procurar ch'i vegnia duvrà main energia, che l'effizienz energetica vegnia augmentada e che energias regenerablas vegnian promovidas. Il cussegl federal ed il parlament èn cunter l'iniziativa e cunter quella èn er las partidas burgaisas grischunas. Ier han *Valérie Accola*, (pps), cusseglier naziunal *Martin Candinas*, (pcd), deputà *Andreas Felix* (pbd) e deputà *Karl Heiz*, (pld) preschentà lur arguments da refusar l'iniziativa.

Ilis custs per il current s'augmentassan

A vess il pievel svizzer d'acceptar l'iniziativa fiss quai in grond donn per l'economia ed er per l'economia grischuna, ha ditg Valérie Accola, la secretaria da la pps grischuna. Ilis custs per l'energia e cunzunt la segirtad dad avair current saja oz da gronda impurtanza per mintga manaschi. Ilis custs bass per l'energeia, sco da preschent, sajan schizunt exi-



Cunter l'iniziativa che pretenda da sortir immediat da l'energia atomara: Andreas Felix, Karl Heiz, Valérie Accola e Martin Candinas (da san.).

FOTO G. N. STGIER

stenzials per blers manaschis, ha ditg Accola. Cun in «gea» a l'iniziativa vegnan ilis custs dal current a s'augmentar e quai tut auter che en favur da la forza idraulica, ha menziunà la nova commembra dal cussegl pitschen da la vischnanca da Tavau.

Retrair il current dad auters pajais

Cusseglie naziunal Martin Candinas ha ditg che las partidas burgaisas na sajan betg cunter la sortida da l'energia atomara, persuenter cunter in abandun immediat da quella. La realisaziun da quella haja da succeder en connex cun la stra-

tegia 2050 e quai sur plis decennis. «Pass per pass e na en in culp saja da renunziar a l'energia nucleara», ha menziunà il cusseglier naziunal da la Surselva. A vess l'iniziativa da vegnir acceptada, lura haja la Svizra da retrair almain 40% current dad auters pajais sco da la Germania, da la

Frantscha e schizunt da la Russia e quai saja inacceptabel. Cun l'approvaziun da l'iniziativa vegniss er la forza idraulica vidlonder, cunzunt quai che pertutga amplificaziuns necessarias ed urgentas, ha accentuà Candinas.

Rinforzar la confidenza

La Svizra sco lieu d'economia saja internaziunal abla da concurrer er grazia a l'agir statal a favur da l'economia. L'iniziativa resguarda betg quel aspect e quai en ina moda e maniera massiva, ha ditg Andreas Felix, il president da la pbd grischuna. Dad interromper gia il 2017 trais ovras atomaras, sche l'iniziativa vegniss acceptada, saja segir na realisabel cun esser quai in process complex ed ina planisaziun dad almain tschintg onns. Da retrair current «tschuf» dals pajais vischins, quai na saja segir betg prudent, ha menziunà Felix.

In giu cun il fiu

Ilis adherents da l'iniziativa pretendan adina puspè che cun sortir da las ovras atomaras profiteschia en spezial la forza idraulica, ha ditg Karl Heiz, il deputà da la pld. Quai saja tut auter che la verdad e plitost cardientschas blauas. Il Grischun saja fitg dependent da la gulivaziun da finanzas naziunala ed al chantun saja segir dretg sch'i giaja bain cun ilis chantuns Argovia e Turgovia. Uschia saja quai pauc auter che in giu cun il fiu sch'ils iniziants da l'iniziativa fetschian credibel al suveran che cun in «gea» a l'iniziativa vegnia gidà ils tschains d'aua. La sortida da l'energia atomara saja per il pazient energia idraulica la medischina sbagliada, ha concludì Heiz ses pled.